

Benny Nisbet, PPA

Relacion entre Hulanda y Aruba a deteriora

Hasta por a sinti 'tension' y desconfianza

Durante discurso na Arubadag na Hulanda



CU atencion partido PPA a sigui e bishita di nos Ministro Presidente Nelson Oduber pa Hulanda siman pasa y comienso di e siman aki.

E hecho cu e prome reunion cu staatssecretaris drs. Bijleveld-Schouten a tuma lugar bao di cuater wowo pa nos di PPA manera sa bisa na Hulandes: "spreekt boekdelen".

Ta bao di cuater wowo politico Hulandes sa scohe pa bisa mandatario di otro parti di Reino Hulandes ora cu nan tin mensahe fuerte y dificil pa traga. Pa medio di e tipo di reunion aki ta prepara e man-

datario di Caribe pa e "sla" politico cu ta na caminda.

PPA a señala caba durante di nos conferencia di prensa di siman pasa cu e lasonan y e ambiente entre Hulanda y Aruba a cuminsa deteriora y esaki negativamente. E reunion di 2de Kamer net prome cu yegada di Ministro Presidente Nelson Oduber na Hulanda pa discuti e forma cu ministro di Justicia Rudy Croes a atende cu e rapport di VNO cu a cai den man di autoridatnan Arubiano tabata un señal hopi cla di e malcontento Hulandes.

Di e reunion aki a sali e intencion Hulandes pa laga haci un estudio si pais Aruba despues di 23 aña di existencia como pais den Reino Hulandes ta cumpli cu e condicionan y espiritu di un estado di derecho. Hulanda ta haci esaki basa riba articulo 43 lid 2 di Statuut.

Pero locual tabata ainda mas cla ta ora nos por a scucha y mira e discursonan na television cu a tuma lugar na e parti ceremonial di Arubadag di tanto staatssecretaris drs. Bijleveld y Prome Ministro Nelson Oduber.

Na un forma hopi diplomatico memey di tur e pabien na pueblo di Aruba y na e arubianonan biba na Hulanda, staatssecretaris Bijleveld a manda un mensahe pa Aruba cu Hulanda ta masha preocupado cu e tono cu cual autoridad di Aruba ta papia den direccion di Madre Patria Hulandes. E discurso di nos Ministro Presidente Nelson Oduber ta muestra un Ministro Presidente Oduber cu a bisa Hulanda pa no mishi cu Aruba.

Deterioro evidente!

E lasonan di deterioro entre Hulanda y Aruba ta hopi evidente!

- E hecho cu KLM a stop di

bula pa Aruba;

- E estudio basa riba articulo 43 di Statuut consiso 2 si Aruba ta cuadra cu un estado di derecho.

- E hecho cu riba nivel di parlamento, Hulanda tin intencion di tene e tri-partite cu lo mester worde teni na juni proximo te na october, cu otro palabra despues di eleccion, mustrand cu Hulanda un vez mas a fada di e constelacion politico actual.

- declaracionan di ministro Rudy Croes cu Aruba mester opta pa e direccion di Independencia.

Sinembargo, Pueblo di Aruba mes mester saca su propio conclusion:

Pueblo mester di un partido cu por ofrece pueblo un Rumbo Sigur!

PPA ta ofrece nos pueblo "Un rumbo Sigur" cual lo ta basa riba dos concepto: Un cambio real den politica Arubano cu e meta di crea un cambio di mentalidad y di ambiente basa riba respet pa tur hende y e concepto di Justicia Social, pasobra esnan cu a carga e signatura di gobernacion arubano esta AVP y MEP no a logra parti e crecimiento economico cu henter e pueblo arubano. Y esaki ta hustamente meta di partido PPA.

Uni na PPA pa salba nos pueblo....Hunto nos por!



noticia@awemainta.com

Tel: 583-1400

Fax: 583-1444